

四庫全書

史部

欽定四庫全書

史部

欽定大清會典則例卷七十一
三

詳校官檢討臣劉炘

編修臣程嘉謨覆勘

總校官原任中允臣王燕緒

校對官中書臣孫梅

謄錄監生臣祝然

欽定四庫全書

欽定大清會典則例卷七十一

禮部

儀制清吏司

風教

一名宦鄉賢崇祀順治元年定名宦鄉賢風教
所關提學官遇有呈請務須覈實確據若有受
人請求妄舉者師生人等即以行止有虧論其

從前冒濫者徑自革除○雍正二年覆準名宦鄉賢相沿歲久冒濫實多行令各省督撫學臣秉公詳察如果功績不愧名宦學行允協鄉評者將姓名事實造冊具結送部覈準仍許留祀若無實蹟報部革除嗣後有呈請入祀者督撫學臣照例報部覈明如私自批行入祀事覺將請託與受託人等治罪出結具詳地方官一并議處○三年覆準名宦鄉賢照旌表節婦歲終

彙題例令各省督撫學臣秉公察覈每年均於八月以前彙題並將事實冊結送部詳察庶免冒濫入祀之弊○乾隆十四年遵

旨議準名宦鄉賢嗣後督撫題報到日該部務確覈事跡倘名實不能相副即秉公指駁將詳報不實之地方官照例題叅庶名器不致濫邀而教化益臻純備○二十年

諭直省建立名宦鄉賢祠即古者瞽宗之祀所以崇

德尚賢與斯祀者必其人實可當之無愧方足以
光俎豆而式鄉閭其典綦重近時大臣中有以祖
父得祀鄉賢具奏謝恩者夫大臣身居九列部臣
督撫誼屬同官彼此瞻徇勢所不免即使採訪悉
為公當而悠悠之口難保其必無遺議又況名實
未必盡孚者乎且入祠既多朝貴先人則潛德韜
光之正士必且恥與為伍崇祀大典將不以為榮
而以為辱至實在政績茂著德望皆隆者或子孫

不能自振必轉致湮沒無傳矣當其具呈公舉雖
托之輿論而主持為首者乃繫嫻族衿士貢諛徵
賄何所不有風勵激勸之謂何不亦瀆典章而褻
名器乎朕亦非謂大臣祖父必不可入祀也果使
政事人品足為矜式自必久而益彰何妨待之十
數年後而必及其子之備位大僚亟亟題請以至
公之舉而冒至私之名乎嗣後見任九卿祖父祭
不得題請入祠其身後鄉評允當者聽著為令欽

此

一旌表節孝順治五年題準孝子順孫義夫節婦自元年以後曾經具奏者仍行巡按再為覈實造冊報部具題旌表○九年

諭諸王宗室覺羅內有孝友義順及守節貞烈者宗人府覈實具奏交禮部題請旌表欽此○又題準直省孝子順孫義夫節婦州縣官申府府申道道申巡按御史巡按御史覈實奏請下部察勘覆準

旌表滿洲蒙古漢軍孝子順孫義夫節婦該管
佐領驍騎校送參領參領送都統副都統都統
副都統送部由部覈實奏請旌表○又題準割
股或致傷生卧水或致凍死恐愚民仿效不準
旌表○十年題準宗室內節孝者各依等第頒
發

恩賜親王固倫公主親王適福晉給銀百兩段十六
疋世子碩公親王側福晉世子福晉給銀

九十兩段十四疋郡王郡主世子側福晉郡王
適福晉給銀八十五兩段十二疋貝勒縣主郡
王側福晉貝勒適夫人給銀八十兩段十一疋
貝子貝勒側夫人郡君貝子適夫人給銀七十
五兩段十疋鎮國公貝子側夫人縣君鎮國公
夫人給銀七十兩段九疋輔國公鎮國公側室
鄉君輔國公夫人給銀六十五兩段八疋鎮國
將軍輔國公側室給銀六十兩段七疋輔國將

軍鎮國將軍夫人給銀五十五兩段六疋奉國
將軍輔國將軍夫人給銀五十兩段五疋奉恩
將軍奉國將軍淑人給銀四十五兩段四疋奉
恩將軍恭人給銀四十兩段三疋鎮國將軍輔
國將軍奉國將軍奉恩將軍女及閒散宗室並
妻女給銀三十五兩段二疋以上均由戶部頒
給由內院撰

勅一道獎諭凡旌表貞烈者自固倫公主親王福晉

卷七十一
以下輔國公夫人以上

欽賜羊酒紙張內院撰文遣官致祭鎮國將軍夫人
以下閒散宗室妻女以上部給羊酒紙張內院撰文
遣官致祭凡覺羅內有節孝者給銀三十兩段
一疋有貞烈者給羊酒紙張內院撰文遣官致
祭。又題準凡旌表節孝在直省府州縣者官
給銀三十兩滿洲蒙古漢軍支戶部庫銀三十
兩聽其自行建坊。十二年題準各直省孝子

順孫義夫節婦各該督撫於每年十二月照例覈實具奏禮部覆覈分別題請旌表滿洲蒙古漢軍令叅佐領察實保送都統副都統再加覈實歲終送部分別題請旌表。十三年題準親王薨妾媵殉節者禮部給羊酒紙張內院撰文遣官致祭。十四年題準凡婦人已受

誥封者不更旌表。十五年定直省有實在孝子撫按確勘詳開事實具題由部覆覈確實請

勅吏部考試酌量選授官職如有冒濫捏報將原舉
官叅處○十七年題準廣西殉難婦女有親屬
者給銀建坊無親屬者共支銀六十兩立碑通
鑄姓氏以表貞烈○十八年

諭滿漢節婦準一體給米欽此○康熙六年議準民婦
三十歲以前夫亡守節至五十歲以後完全節
操者題請照例旌表○七年定貞節婦女實行
逐一開明取具親戚該管官保結詳加覈實送

部不得僅以年歲已及草率濫送。十一年議
準強姦不從以致身死之烈婦照節婦例旌表
地方官給銀三十兩聽本家建坊。十四年題
準凡節婦已經覈實到部者雖病故亦準彙題
旌表。二十七年

諭夫亡從死前已屢行禁止近見京城及各省從死者
尚多人命關係重大死亡亦屬堪憐修短聽其自然
豈可妄捐軀體況輕生從死事屬不經若復加褒揚

恐益多摧折嗣後夫歿從死旌表之例應停止自王妃以下及小民婦人從死永行嚴禁如有必欲身殉者赴部及該管官司陳訴竢奏聞定奪欽此○三十年題準節婦自三十歲以內守節至五十歲者即行旌表過五十者將遲延緣由報部○三十七年

諭興起教化鼓舞品行必以孝道為先孝子尤宜褒獎八旗貧人克盡孝道誠為非易如有盡孝於其父母

者覈實奏聞欽此○五十一年題準鑲紅旗有受聘
未婚之女聞訃剪髮成服居夫墓側守節三年
從容自縊與尋常輕生者不同奉

旨照例旌表○五十二年覆準民間貞女未婚聞訃夫
志守節絕食自盡照例旌表○五十四年覆準
有孀婦撫子守志因親屬逼嫁投繯原非激烈
輕生照五十二年貞女例旌表○五十九年覆
準節孝昭著所司不覈明詳報者交部議處所

屬上司不轉詳題請旌表者交部一并議處通行八旗直省一例遵行○雍正元年

諭恩詔內開旌表節義乃彰善大典每見直省地方有力之家尚能上達而鄉村貧窶之人則多湮沒無聞著該督撫學臣及有司遍加採訪務使苦寒守節之家同沾恩澤至節婦年逾四十而身故計其守節已逾十五載以上者亦應酌量旌獎欽此遵

旨議定凡八旗直省督撫學臣令所在有司遍加採訪

凡有節義之人從前因無力不能上達者悉行
申報督撫學臣其守節十五載以上逾四十而
身故者亦令各該地方官據實報明一例旌表
直省督撫學臣覈實於歲終彙題八旗都統於
歲終彙送禮部由部每年二月內將前一歲八
旗直省題送孝行節義彙題請旌永為定例○

又

諭恩詔內開旌表節義給銀建坊民間往往視為具文

未曾建立恐日久仍至泯沒不能使民有所觀感著
於地方公所設立祠宇將前後忠孝節義之人皆標
姓氏於其中已故者則設牌位於祠中祭祀用闡幽
光而垂永久其建坊銀仍照舊支給欽此遵

旨議準設立祠宇應行順天府奉天府直省府州縣衛
分別男女每處各建二祠一為忠義孝弟祠建
於學宮之內祠門內立石碑一通將前後忠義
孝弟之人刊刻姓氏於其上已故者設位祠中

一為節孝祠別擇地營建祠門外建大坊一座
將前後節孝婦女標題姓氏於其上已故者設
位祠中八旗分左右翼擇地各建二祠一應碑
坊刊題姓氏皆照此例每年春秋二次致祭直
省交與各府州縣衛守土官兩翼交與大宛二
縣其建立祠宇碑坊銀各省府州縣衛動用正
項錢糧修造仍報工部奏銷左右兩翼祠宇碑
坊交與工部營造仍令各所在有司不時修葺

○三年議準兵民節烈原宜一例旌表因事由學校以致營伍未經舉報行令直省督撫提鎮學臣宣諭該地方文武官弁詳察營伍中有三十歲以內守節至五十歲以後及守節十五載以上年踰四十身故者出具印結移該學教官照民間取結之例加具印結申報州縣轉詳督撫學臣具題由部彙請旌表永為定例如有隱漏不報及冒濫妄舉等弊察出將該管官題叅

處分○又覆準孝女以父母未有子姓終身奉
親不嫁照孝子一例旌表○四年鑲白旗貞女
未婚聞壻病故自盡家人救甦至次日剪髮摘
環畧往壻家願終身守墓該旗都統奏請旌表
奉

旨如此貞節甚屬可嘉理應旌表○又覆準雲南總督
具奏順治十六年有監生遭流寇被害妻妾及
女皆投崖而死至今無嗣照廣西殉難婦女無

親屬之例令該地方官支銀六十兩立碑通鑑
姓氏又有民人妻妾投水自盡見遺一子照廣
西殉難婦女有親屬之例給銀三十兩自行建
坊其節孝祠內設位題坊悉照

恩詔定例遵行○五年覆準定例旌表孝子順孫義夫
節婦惟孝婦旌表未有成例但婦女孝行無虧
宜邀旌典應準給建坊銀三十兩其節孝祠題
坊照

恩詔遵行○又

諭各省建立忠義節孝祠表揚德行著行文各省督撫
詳加察勘有無冒銷果否堅固之處不得稍有朦溷
並令各地方官將建立祠宇造入冊內前後交代欽
此○六年

諭據福建巡撫奏稱孝子李盛山割肝救其母者母病
愈後孝子傷重自故請加旌表部議以割肝乃小民
輕生愚孝向無旌表之例應不準行朕念割肝療疾

事雖不經而其迫切救母之心實難得而可憫已加
恩準其旌表矣嘗讀韓愈之文曰母疾則止於烹粉
藥石以為事未聞毀傷肢體以為養苟不傷於義則
聖賢當先衆而為之矣又讀朱子書曰割股固自不
是若誠心為之不求人知亦庶幾今乃有以此要譽
者是先儒論及此者屢矣本朝順治年間定例割股
或致傷生臥水或致凍死恐民仿效不準旌表伏思
我

世祖章皇帝

聖祖仁皇帝臨御萬方立教明倫與人為善而於此例
慎於旌表者誠天地好生之盛心聖人覺世之至道
視人命為至重不可以愚昧而誤戕念孝道為至弘
不可毀傷正理立法垂訓實有深意存焉但向來地
方有司未嘗以聖賢經常之道與國家愛養之心明
白曉諭開導編氓是以愚夫愚婦救親而捐軀殉夫
而殞命者往往有之既有其事若不予以旌表恐無

以彰其苦志而慰其幽魂所以數十年來雖定不予旌表之例而仍許其奏聞且有邀恩於常格之外者仰見

聖祖皇帝哀矜下民之

聖心固如是之周詳而委曲也孝經曰身體髮膚受之父母不敢毀傷孝之始也孟子曰事孰為大事親為大守孰為大守身為大此皆言人子一身乃父母之遺體雖一髮一指不可偶有虧損以傷父母之所遺

也孔子曰父母惟其疾之憂蓋父母愛子之心無所不至偶有疾病尚以為憂設有不肖忤逆之子父母且怒而矜之其純孝之子而父母之憐愛又當如何也豈有以己身患病之故割其子之肝肉充飲饌而和湯藥其父母之心斷無不驚憂怵惕不安之理若因此而至於傷生又豈所忍聞者乎夫父母有疾固人子所當盡心竭力之時而孝道多端實不容効命捐軀於一節孔子曰生事之以禮死葬之以禮祭之

以禮是人生孺慕之誠原通百年而無間者也人子
一人承先啟後負荷甚鉅若舍生殞命於倉卒之間
而忘宗祀繼續之重恐非所以為孝也況人子於親
本乎天性倘能盡至誠純孝之實則親病雖篤呼籲
請禱力省一身之過誓願為一正人如此必能感天
地動鬼神何須割肝剗股以為回生之良劑乎家庭
之行惟在至誠至敬善體親心不必以驚世駭俗之
為著奇於日用倫常之外也至若婦人從一之義醮

而不改乃天下之正道而其間節婦烈婦亦有不同者烈婦以死殉夫慷慨相從於地下固為人所難能然烈婦難而節婦尤難蓋從死者取決於一時而貞守者必閱夫永久從死者致命而遂已而守貞者備嘗其艱難且烈婦之殉節捐軀其間情事亦有不同者或迫於貧窶而寡自全之計或出於憤激而不暇為日後之思不知夫亡之後婦職之當盡者更多上有翁姑則當奉養以代為子之道下有後嗣則當教

育以代為父之道他如脩治蘋蘩經理家業其事難以悉數安得以一死畢其責乎是以節婦之旌表載在典章而烈婦不在定例之內者誠以烈婦捐生與割肝剗股之愚孝其事相類假若仿效者多則戕生者衆為上者之所不忍也向來未曾通行曉諭朕今特頒諭旨著地方有司廣為宣布務期僻壤荒村家喻戶曉俾愚民咸知孝子節婦之自有常道可行而保全生命之為正理則倫常之地皆合中庸不負國

家教養矜全之德矣倘訓諭之後仍有不愛軀命蹈
於危亡者朕亦不槩加旌表以成閭閻激烈之風長
愚民輕生之習思之思之特諭欽此○八年江西巡
撫以夫亡從死未婚烈女二人請旌經部具題
請

旨仍恩準旌表○十一年議準河南商水縣十二歲幼
女婁氏拒姦致死當幼稚之年守正不污實屬
貞烈應照例旌表以慰幽魂並令該地方官設

位於祠○十三年

諭凡烈婦輕生從死昔年

聖祖仁皇帝曾降旨禁止朕於雍正六年又降旨曉諭
至周至悉數年以來因各省奏請旌表烈婦者尚少
朕是以格外加恩準其旌表今數日之內題奏殉夫
盡節烈婦烈女多至十數人直隸則有田氏等五名
江蘇則有許氏等四名可見地方官未將從前諭旨
剴切曉諭鄉曲愚民尚未深悉

聖祖仁皇帝與朕重惜民命之至意以致民間婦女激
烈捐軀者更多於前嗣後若槩予旌表恐轉相則效
易至戕生深可憫惻著地方有司將朕前旨廣為宣
布俾遐陬僻壤家諭戶曉倘宣諭之後仍有不顧軀
命輕生從死者不槩予旌表以長閭閻憤激之風欽
此○是年十月覆準婦人守節有受封在先夫
死在後之命婦仍照例無庸旌表其三十歲以
前夫死守節迨撫孤成立之後因子顯達始獲

受封應一例旌表以發潛德以廣

皇仁○又議準舉報節孝向例皆由生監具呈經縣
申府以至司撫其中衙門甚多胥吏輾轉弊端
百出應令各直省督撫飭所屬州縣將一應例
合旌表之節婦並貞女孝子詳悉條例遍示鄉
城士民令本家開載事實具呈並飭鄉鄰族長
於具呈日一并據實投遞甘結該學該州縣覈
其事實確據即行加結詳報該督撫確覈存案

據實彙題無庸往返駁詰致滋弊端至於給坊銀亦應令本家具領當堂驗發不經吏胥之手庶潛德幽光不致湮沒而旌揚盛典亦無遺漏之處○乾隆元年順天府尹以未婚之女自縊殉夫題請旌表經部定議節烈輕生事在奉旨禁止之後不便準旌具題奉

旨著加恩旌表○二年議準舉報節孝該州縣學確數加結徑詳督撫學政覈實彙題仍備文申報

府司存案其各直省凡有節孝並令督撫主臬
會同學政具題以昭畫一○三年貴州巡撫以
黃平州烈婦郭氏遇逆苗猖獗舅姑及夫皆被
害氏激烈罵賊觸石而死幼女二姑年十五歲
同母殉節家童關保年十二歲背負家主幼子
避難全生均應題請旌表經部覈議以烈婦母
女例得旌表至家童向無旌表之例而幼童關
保年僅十二似茲忠義實屬可嘉可否准予旌

表以示風勵具題請

旨奉

旨著加恩旌表。六年議準道姑雖不在兵民婦女之列而禦暴全貞實為貞烈應照例旌表。又議準粵西遣婦以僉遣夫亡孤踪殉節與激烈輕生者有間應予旌表以闡幽貞。七年議準童養之妻尚未成婚而能以禮自持堅拒夫之和姦因而致死應照例旌表令建坊於烈女父

母之門。十年議準節孝於生前題坊至旌表
後身故者應一例入祠以示風勵。又議準曾
經旌表之節孝間有一二貧苦難以存立之人
應令督撫分飭各州縣覈實取具鄰族及印官
各結酌量給與口糧俾存活有賴不致失所。
十一年議準旗人已經開戶之節婦雖與見在
戶下服役者不同究與良家子有間應止許給
銀建坊其節孝祠內題坊設位之處悉行停止

以昭名分以別等威○十四年遵

旨議準旌表節孝乃

朝廷風化所關必視良有司奉行以實斯德意及於閭閻而觀感興於衆庶嗣後舉報節孝請令直省督撫訓示地方有司實心體訪諮於學校詢於輿論如繫夫亡守志舅姑年老無依婦兼子職奉養終身或宗祧所繫藐孤寡子撫育有成以綿嗣續或外迫強暴毀形見志事近捐軀終

保貞潔或境處單微甘心荼蓼饑寒并迫秉節
念堅如斯之類孝義兼全阨窮堪憫允宜亟為
表彰具結詳報督撫學臣秉公覈定彙疏題請
旌表給銀建坊歿後致祭祠內以光俎豆其在
荒村僻壤孤苦單寒舉報無力易至隱沒者尤
宜搜訪詳報以昭顯幽闡微之義如因仍故習
委之隣族呈報胥役覆覈以致舉報不實單寒
遺漏均照定例叅處督撫不據實糾叅別經發

覺亦交部議處至於尋常守節者原有表閭之
例應令地方官於本家呈報時覈其年例相符
詳明督撫學臣酌量給匾嘉獎附疏彙題仍於
祠內官為立石竢身歿之後鐫題姓氏以免湮
沒無庸建坊祠祀八旗節孝亦照此例畫一辦
理○十五年覆準尋常守節之節婦於題準後
照

欽定清標彤管字樣給與匾額

一旌表義行雍正二年覆準湖廣黃岡縣民鄧
一隆八世同居家逾百口閨門雍睦給與建坊
銀三十兩表其坊曰八世同居之門○十年題
準湖南沅江縣生員譙衿七世同居孝友敦篤
給建坊銀三十兩於忠孝節義祠內題碑並奉
特賜

御書世篤仁風四字以彰義門○是年以陝西武功縣
生員李倬同州生員劉運惇七世同居具題請

旌奉

旨據陝西巡撫奏稱武功縣生員李倬同州生員劉運
惇承家孝謹七傳皆合族而居懇請旌揚以光盛典
等語李倬劉運惇同居七世敦睦可風著照湖廣譙
衿例朕親書匾額頒賜以示嘉獎其建坊題碑之處
仍著照例行欽此

御書賜李倬敦睦可風四字劉運惇敦本厚俗四字○
乾隆二年題準山西翼城縣生員李煊七世同

居給銀建坊於忠孝節義祠內題碑。是年奏
準民間有捐資周急惠濟本鄉者經該督撫旌
表均應遵照

欽定樂善好施字樣永為成式由部覆本內聲明頒
給。十年題準江南桐城縣監生錢雲鳳共爨
百口同居七世應準其旌表建坊題碑與二年
例同。十六年題準陝西富平縣民韓文星同
居一十二世共爨八十一人華陰縣舉人李睿

聚族而居一門八代同堂共食五十二人均準
旌表建坊題碑與十年例同。十八年題準福
建漳州府貢生陳茂椿六世同居應準旌表建
坊題碑與十六年例同

一百歲旌表康熙九年議準命婦孀居壽至百
歲者題明給與貞壽之門匾額建坊銀三十兩
○四十二年覆準老民年登百歲者照例給與
建坊銀並給昇平人瑞匾額老婦壽至百歲建

坊懸額與命婦同。○雍正六年

諭年屆一百一十八歲之人實為希有著於定例賜坊銀三十兩外加增兩倍共賞銀九十兩嗣後年至一百一十歲加一倍賞賜至一百二十歲者加兩倍賞賜更有多得壽算者按其壽算加增著為定例欽此

○乾隆元年題準湖北江夏縣壽民湯雲山年屆一百三十一歲請照雍正四年加倍賞賜之例於坊銀三十兩外再加三倍賞賜共給一百

二十兩奉

旨著加賞上用段一疋銀四十兩欽此○五年題準
正黃旗壽婦索綽絡氏壽紀百齡居同五世應
照例給銀六十兩建坊並給與貞壽之門及五
世同居字樣○十一年題準元年題旌一百三
十一歲壽民湯雲山又屆十年閱年一百四十
一歲題請旌表應加賞銀三十兩奉

旨著賞給上用段五疋銀五十兩再加恩特賜匾額

以旌人瑞欽此遵

旨由內閣撰擬再閱古稀四字頒賜壽民懸額旌表
○十二年題準原任內務府總管丁皂保連閏
準作百歲

恩賞朝衣一襲

上用段十疋銀千兩給與期頤國瑞四字匾額○十
七年題準廣東惠來縣生員詹星斗壽至百歲
請照例準其旌表奉

旨生員詹星斗年屆期頤實為膠庠人瑞著加恩給
與國子監學正職銜仍於常制外賞給上用段二
疋欽此

一收養孤幼雍正二年

諭聞廣渠門外有育嬰堂一區凡孩稚之不能養育者
收留於此數十年來成立者頗衆夫養少存孤載於
月令與扶衰卹老同一善舉為世俗之所難朕心嘉
悅特賜御書功深保赤匾額並白金千兩順天府尹

等其宣示朕意並倡率資助使之益加鼓勵再行文
各該督撫轉飭有司勸募好善之人於通都大邑人
煙稠集之處若可以照京師例推而行之其於字弱
卹孤之道似有裨益而凡人怵惕惻隱之心亦可感
發而興起矣欽此

一一產三男康熙二年定凡一產三男或男女
並產八旗由禮部具題直省由該督撫具題由
部題覆行戶部準給米五石布十疋○十三年

定一產三男仍準題覆其男女並產及一產三女者不必具題○三十三年

諭一產三男令禮部定議即交戶部具奏照例賞給欽此○三十五年

諭嗣後如有一產三男等事該督撫具題著該部照例行文賞給停止單題歲終彙題以聞欽此

一收埋枯骨順治九年題準直省饑饉死者暴骨草野各令委官掩埋仍將埋過數目報部又

令各地方官於空閒官地設立義塚凡死不能
葬及無主暴骨盡行收埋如有好義之人收瘞
貧屍及掩埋枯骨數多者有司勘實給匾旌獎

○十年

詔八旗貧無葬地者每旗各撥給塋地三百畝○康熙
十七年議準三旗內府佐領每一佐領給塋地
三十六畝滿洲蒙古每佐領給塋地十有八畝
漢軍每佐領給塋地十畝○二十四年議準直

省地方如有無主暴露枯骨各該地方官建置
義塚立法收埋仍咨報部



--	--	--	--	--	--	--	--	--

鄉飲酒禮

一鄉飲酒禮順治元年定京府及直省府州縣
每歲於正月十五日十月初一日舉行鄉飲酒
禮設賓介主人衆賓之席順天以府尹為主直
省府以知府州以知州縣以知縣為主大賓擇
鄉里年高有德之人位於西北介以次長位於
西南三賓以賓之次者為之位於賓席之西衆
賓序齒列坐司正以教職為之主揚觶以罰失

儀者贊禮讀法以生員為之以申明

朝廷之法敦序長幼之節。二年定順天府詳稽鄉飲酒禮舊制移送禮部題請施行嗣後每歲由順天府具題將所舉賓介等姓名履歷呈部存案。鄉飲酒讀律令曰律令凡鄉飲酒序長幼論賢良高年有德者居上其次序齒列坐有過犯者不得干與違者罪以違制失儀則揚解者以禮責之。康熙元年議準奉天府州縣行鄉

飲酒禮儀與順天同。四年議準錦州府州縣
行鄉飲酒禮儀與奉天同。雍正元年

諭鄉飲酒禮乃敬老尊賢之古制近聞年久視為具文
所備筵燕亦甚草率應加謹舉行欽此。是年順天
府舉行鄉飲酒禮

特命禮部堂官前往監禮歲以為常。乾隆二年覆準
鄉飲之典必賓介得人始足以示觀感而興教
化應通行嚴飭嗣後所舉賓介務擇齒德兼優

允協鄉評之人如地方官徇情濫舉即應題叅若所舉得人而不法之徒或有藉端阻撓者亦應嚴加究治。十八年覆準各省舉行鄉飲事不畫一旦竟有頻年闕畧不舉致曠

大典者應令各省督撫轉飭所屬府州縣每歲遵照定例於正月十月舉行二次其賓介之數據舊儀所載鄉飲酒圖有大賓介賓一賓二賓三賓衆賓與大僕一僕二僕三僕之名按儀禮賓

若有遵者諸公大夫則既一人舉觶乃入注言
今文遵為僎又曰此鄉之人仕至大夫者來助
主人樂賓主人所禁而遵法者也或有無來不
來用時事耳又曰不干主人正禮也謂之賓者
同從外來耳大國有孤四命謂之公又疏言一
人舉觶為旅酬始乃入即是作樂前入又戴記
坐僎於東北以輔主人所謂席於賓東助主人
樂賓者也其言主人親速賓及介而衆賓自從

之至於門外主人拜賓及介而衆賓自入三揖
至於階三讓以賓升拜至獻酬辭讓之義繁及
介省矣至於衆賓升受坐祭卒飲不酢而降皆
無一言及僎者所謂不干主人正禮者也嗣後
應令順天府及直省府州縣先期訪紳士之年
高德邵者一人為賓次為介又次為衆賓皆由
州縣詳報府尹督撫覈定舉行其本地有仕至
顯官偶居鄉里願來觀禮者依古禮坐於東北

順天府及直省會城一品席南嚮二三品席西嚮各府州縣三品以上席南嚮四五品席西嚮無則闕之不立一僎二僎三僎之名不入舉報之內仍將所舉賓介造具姓名籍貫清冊送部存案倘鄉飲後間有過犯按所犯輕重詳報褫革咨部除名并將原舉之官議處

欽定大清會典則例卷七十一

欽定四庫全書

欽定大清會典則例卷七十二

禮部

儀制清吏司

儀衛

一王公儀衛崇德元年定親王銷金紅繖二纛
二旗十立爪骨朶各二吾仗四郡王銷金紅繖
一纛一旗八卧爪二吾仗四貝勒旗六骨朶紅

仗各二緞纛視郡王貝子畫雲紅緞一豹尾槍
二旗六紅仗二城內止用緞仗鎮國公紅緞一
餘視貝子城內止用紅仗以上各執事人均青
衣紅帶青帽銀頂上挿紅翎輔國公豹尾槍一
餘視鎮國公城內止用紅仗執事人青衣紅帶
藍翎紅氍帽鎮國將軍金黃緞一旗六城內用
前引二名後從六名輔國將軍旗緞視鎮國城
內用前引一名後從四名奉國將軍旗四城內

用後從四名。又定王公等至

御前均不得設儀衛。順治九年題準親王紅羅繡
五龍曲柄繖一紅羅銷金繖二紅羅繡花繖二
紅羅繡花扇二青羅繡孔雀扇二立爪卧爪骨
朶吾仗各四大纛二條纛二旗十大刀二豹尾
槍二馬六匹京城內止用曲柄繖一繡花繖扇
各二立爪卧爪骨朶吾仗全馬四匹世子紅羅
繖一卧爪骨朶吾仗各二大纛條纛各一旗八

大刀二減紅羅繡花繖豹尾槍餘視親王京城
內止用銷金繖二繡花扇二立瓜卧瓜骨朶吾
仗全馬四匹郡王吾仗四條纛二減紅羅繖大
纛大刀餘視世子京城內用馬二匹立瓜卧瓜
骨朶吾仗全繖扇視世子貝勒紅羅銷金繖二
紅羅繡花扇二立瓜卧瓜骨朶吾仗各二條纛
一旗六馬四匹京城內止用銷金繖一立瓜卧
瓜骨朶吾仗全貝子紅羅銷金繖一減卧瓜及

馬餘視貝勒京城內止用立爪骨朵吾仗鎮國
公紅羅銷金織一青羅繡孔雀扇一骨朵吾仗
各二旗六京城內止用骨朵吾仗輔國公儀衛
視鎮國公鎮國輔國奉國各將軍仍照崇德元
年例各儀衛出京城乃許全設遇元日
萬壽聖節冬至大朝日除纛旗外餘均全設至下馬
牌止○又定親王至

午門外郡王至

闕下貝勒以下在闕門外下馬牌各下轎馬。又定王公均得乘明轎王以下貝勒以上用轎夫八人貝子公四人貝勒貝子公乘轎至

皇城外易馬入如願乘馬者聽。康熙六年題準

親王郡王轎夫執事人用繡團獅綠段衣貝勒

貝子公轎夫執事人素綠段衣。二十四年題

準宗室親王世子郡王馬韁

即扯手

用金黃長子

貝勒貝子用紫不得給與內外官員其從前給

過者聚行禁止○六十一年十二月奉

旨向例親王豹尾槍二大刀二郡王則無親王著給豹尾槍四大刀四郡王給豹尾槍二大刀二○乾隆二年覆準金黃秋香色鞦轡惟

特恩賞用金黃朝衣坐褥之王等許用其餘親王以下均不得用○二十一年奏準世子增豹尾槍二長子儀衛與貝勒同

一公主以下儀衛崇德元年定固倫公主清道

旗二銷金紅繖一青扇一拂子二金水盂一金
盆一紅仗吾仗各二轎車均用紅蓋紅幃青緣
蓋角青垂幃和碩公主減旗及金盃餘視固倫
公主轎車紅蓋紅幃藍緣蓋角藍垂幃以上赴
朝止用繖扇紅仗吾仗郡主減金盆及紅仗餘
視和碩公主轎車青蓋青幃紅緣蓋角紅垂幃
赴朝用繖扇吾仗縣主紅仗二減扇吾仗餘視
郡主車青蓋藍幃紅緣蓋角紅垂幃郡君銷金

青繖一紅仗二車藍蓋藍幃紅垂幃赴朝各用
繖紅仗縣君紅仗二車藍蓋藍幃紅緣青垂幃
赴朝用紅仗鄉君車與縣君同○順治九年題
準固倫公主曲柄繖一紅寶相花繖二青寶相
花扇二紅孔雀扇二熏二立瓜卧瓜骨朵吾仗
各二轎車均用紅蓋紅幃青緣蓋角紅垂幃和
碩公主減寶相花扇餘視固倫公主轎車紅蓋
紅幃青緣蓋角青垂幃郡主減曲柄繖卧瓜餘

視和碩公主轎車紅蓋紅幃藍緣蓋角藍垂幃
縣主紅寶相花繖一青花扇二立爪吾仗各二
轎車青蓋青幃紅緣蓋角紅垂幃郡君車青蓋
藍幃紅緣蓋角紅垂幃縣君車藍蓋藍幃紅垂
幃鄉君車均藍蓋藍幃鎮國公女青緣紅垂幃
輔國公女紅緣青垂幃○康熙六年題準公主
郡主轎夫執事人用繡團獅綠段衣縣主轎夫
執事人素綠段衣公主以下鄉君以上赴朝儀

衛至

紫禁城止固倫公主許隨入婦女五名和碩公主
郡主四名縣主三名郡君二名縣君鄉君一名
○三十年定固倫公主轎車金黃蓋紅幃紅緣
蓋角金黃垂幃郡主紅蓋紅幃青緣蓋角紅垂幃
縣主紅蓋紅幃藍緣蓋角藍垂幃郡君紅蓋藍
幃藍緣蓋角紅垂幃縣君青蓋青幃紅緣蓋角

紅垂幃鎮國公女鄉君青蓋青幃藍緣蓋角紅
垂幃輔國公女鄉君青蓋藍幃紅垂幃○乾隆
二年覆準金黃馬韁金黃轎襍惟公主王福晉
得用郡主夫人以下均不得用

一福晉夫人儀衛崇德元年定親王福晉清道
旗二銷金紅繖一青扇一拂子二金盃一金盆
一紅仗吾仗各二轎車紅蓋紅幃青緣蓋角青
垂幃赴朝止用繖扇紅仗吾仗郡王福晉減金

孟紅仗餘視親王福晉轎車紅蓋紅幃藍緣蓋角
藍垂幃赴朝用繖扇吾仗貝勒夫人銷金紅繖
一拂子紅仗各二轎車青蓋青幃紅緣蓋角紅
垂幃赴朝用繖紅仗以上執事人均青衣紅帶
青帽銀頂上挿紅翎貝子夫人車青蓋藍幃紅
緣蓋角紅垂幃鎮國公夫人車藍蓋藍幃青緣
紅垂幃鎮國
將軍夫人車青蓋藍幃青垂幃輔國將軍夫人

車藍蓋藍幃藍垂檐奉國將軍淑人車藍蓋素
幃藍垂檐親王以下各側室儀衛均降適一等
○順治四年定親王福晉曲柄繖一紅方繖二
紅繡花繖二青繡花扇一紅繡孔雀扇一熏二
立瓜卧瓜骨朵吾仗各二郡王福晉紅繡孔雀
扇二減曲柄繖青花扇卧瓜餘視親王福
晉貝勒夫人紅繡花繖一青繡花扇一立瓜吾
仗各二王以下貝勒以上各側室均降適一等

親王福晉以下各轎車之制惟輔國公夫人改
用藍蓋藍幃紅緣蓋角青垂檐餘均與初定例
同○九年題準親王福晉曲柄繖一紅繡寶相
花繖二青繡寶相花扇二紅繡孔雀扇二熏二
立瓜卧瓜骨朵吾仗各二轎車紅蓋紅幃青緣
蓋角紅垂檐世子福晉減寶相花扇轎車青垂
檐餘均視親王福晉郡王福晉減曲柄繖卧瓜
餘視世子福晉轎車紅蓋紅幃藍緣蓋角藍垂

幃貝勒夫人紅繡寶相花繖一青繡寶相花扇
二立爪吾仗各二轎車青蓋青幃紅緣蓋角紅
垂幃貝子夫人以下奉國將軍淑人以上車飾
均如舊制○康熙六年題準親王福晉側福晉
郡王福晉轎夫執事人用繡團獅綠段衣郡王
側福晉貝勒夫人轎夫執事人用素綠段衣凡
福晉夫人赴朝儀衛至

紫禁城止親王世子福晉許隨入婦女四名郡王

福晉三名貝勒夫人二名貝子公夫人一名。

三十年定親王福晉轎車紅蓋紅幃青緣蓋角
金黃垂幃世子福晉紅蓋紅幃青緣蓋角紅垂
幃郡王福晉紅蓋紅幃青緣蓋角青垂幃長子
福晉紅蓋紅幃藍緣蓋角藍垂幃貝勒夫人紅
蓋青幃青緣蓋角紅垂幃貝子夫人紅蓋藍幃
藍緣蓋角紅垂幃鎮國公夫人青蓋青幃紅緣
蓋角紅垂幃輔國公夫人青蓋青幃藍緣蓋角

紅垂幃以上各側室均降適一等鎮國將軍夫人青蓋藍幃紅垂幃輔國將軍夫人藍蓋藍幃紅垂幃奉國將軍淑人青蓋青幃青垂幃奉恩將軍恭人同車自長子福晉以上朱轅貝子夫人以下紫轅奉國將軍淑人以上黑轅輪均用朱其幃蓋幃公夫人以上用雲段鎮國將軍夫人以下用素段

一京官儀衛崇德元年定固倫公主額駙畫雲

紅繖一豹尾槍二旗六紅仗二執事人青衣紅帶青氈帽銀頂上挿紅翎城內止用繖仗超品公和碩公主額駙杏黃繖一豹尾槍二旗六城內止用前引二名從人十名民公郡主額駙豹尾槍一從人八名餘視超品公子都統尚書縣主額駙減豹尾槍用從人六名餘視公內大臣大學士副都統護軍統領前鋒統領侍郎郡君額駙旗六城內止用前引二名從人四名一等

侍衛護衛叅領前鋒叅領縣君額駙學士郎中
旗四城內止用從人四名二等侍衛護衛鄉君
額駙佐領員外郎旗二城內止用從人二名三
等侍衛護衛護軍校主事以下官許用從人一
名○順治三年定公掌扇貼方金一塊一品官
扇貼圓金四塊二品官扇貼圓金三塊三品官
扇貼圓金二塊四品官用灑金扇五六七品官
用黑素扇八九品官用白素扇○六年定公以

下四品官以上用大小灑金扇各一文職用甘
蔗棍二武職用梭棍二。八年題準民公和碩
公主額駙杏黃緞二旗十大小扇二各貼方金
四侯郡主額駙杏黃緞一旗十扇二各貼方金
三伯扇二各貼圓金一餘視侯一品官旗八扇
二各貼圓金四緞視伯二品官旗六扇二各貼
圓金三緞視一品三品官扇二各貼圓金二餘
視二品四品官旗四灑金扇二宗室覺羅之有

官者各從其品惟扇柄及棍皆髹以朱以上旗
纛在京城內不得用進

皇城內止用小扇不得用大扇及棍。又定官民
等鞍韉牙縫不得用黃色。九年題準公侯伯
都統尚書內大臣大學士及漢文官三品以上
皇城外許乘四人煖轎願乘馬者聽漢武官不準
乘轎各官扇上均書清漢字官銜。康熙元年
題準滿漢公侯伯都統內大臣鎮國將軍子輔

國將軍護軍統領前鋒統領副都統男大學士
學士尚書左都御史侍郎左副都御史鑾儀使
通政使大理寺卿以上在

皇城外許乘四人煖轎願乘馬者聽。又定停止
滿漢學士左副都御史鑾儀使通政使大理寺
卿設儀衛乘轎。又定公和碩公主額駙旗十
杏黃繖二金黃棍四執事人青衣綠帶紅氍帽
銅頂上插綠翎京城內止用繖一侯伯郡主額

駙減繖一餘視公都統鎮國將軍內大臣縣主
額駙子滿漢大學士尚書左都御史旗八杏黃
繖一棍二執事人青衣綠帶紅氍帽銅頂輔國
將軍郡君額駙護軍統領前鋒統領副都統男
滿漢侍郎學士九卿正卿鑾儀使左副都御史
步軍統領旗六餘儀衛執事人均視都統三品
官儀衛視輔國將軍四品官旗四京城內一品
官以上用繖一棍二二品官用棍二。三年定

男散秩大臣在京城內停設儀衛散秩大臣內
有世襲子爵者得設儀衛如子。四年題準四
品以上官乘馬許用繁纓在京大九卿詹事以
上武官男副都統散秩大臣以上許用一人引
馬前導餘官不得僭用。六年定都統鎮國將
軍內大臣縣主額駙子滿漢大學士尚書左都
御史執事人帽頂上插綠翎。七年題準凡加
太師公和碩公主額駙金黃棍四改為紅棍四

棍端用銅瓌執事人用綠布衣綠帶紅氍帽銅頂上挿綠翎繖扇照前定例。又定民公及加級侯郡主額駙金黃棍四改為紅棍四棍端用銅瓌執事人衣帽照前定例。八年題準在京官停用杏黃繖金黃棍民公以下官員均照順治八年例。又定公以下官員出京城許用鞍籠閑馬前導軍民人等不得用違者治罪。三十九年奉

旨衣服鞍轡原有禁例今觀鞍轡等飾甚為僭越下至家奴鞞鞞皆用鍍金朕御鞍轡未嘗以金飾之如此之類尤當嚴禁遵

旨議準馬鞍惟三品官輕車都尉以上許用虎皮及狼狐皮有品級無品級筆帖式及庫使舉人官生貢監生員護軍領催以至兵民等馬鞍不得用繡及倭段絹線環緣鞍韉紅托鞞轡等物不得用鍍金○雍正元年

諭大小官定有品級近有不分官職馬繫繫纓使人引馬嗣後著八旗都統步軍統領都察院嚴行稽察如有此等即行拏奏如大臣等徇情疎忽察出將該管並大臣等一併議處又諸王有賞所屬人員鞍轡者著行文該旗注冊歲終彙奏欽此○七年

諭聞近來引馬繫纓之屬有不按定例任意假借者嗣後大城內著步軍統領稽察外城著五城御史稽察倘有違例僭越之人步軍統領御史不叅奏別經發

覺者將稽察之人一并處分欽此○乾隆十五年

諭本朝舊制文武滿漢大臣凡遇朝會皆乘馬並不坐轎從前滿洲大臣內有坐轎者是以降旨禁止武大臣坐轎未禁止文大臣今聞文大臣內務求安逸於京師至近之地亦皆坐轎若謂在部院行走應當坐轎則國初部院大臣未嘗坐轎此由平時不勤習技業惟求安逸之所致也滿洲大臣當思本朝舊制遵照奉行似此並不演習乘馬倘遇

緊急官差將何如耶嗣後文大臣內年及六旬實不能常乘馬者著照常坐轎其餘著禁止再王公等不分老幼一槩坐轎亦非古道嗣後長朕一輩之王等著照常坐轎其餘王公內有高年者亦許坐轎餘皆乘馬王等既有儀衛除年節列儀衛坐轎朝賀外平時皆著乘馬將此通行傳知倘禁止後有坐轎者著察旗御史即行察叅若御史不叅奏經朕訪聞一并治罪斷不寬宥欽此○又

諭前因諸王及部院滿洲大臣等皆互尚安逸行動
坐轎並不乘馬經朕降旨禁止坐轎是令伊等嫻
習武藝勿致廢弛滿洲舊制之意並非謂大臣等
不應坐轎也近聞王大臣內竟有坐車者試思坐
車與坐轎何異視此乃王大臣等全未識朕欲挽
回滿洲舊制之意轉似有心致朕降旨亦覺赧顏
誠不知伊等是何居心也朕思王大臣早起來圓
明園連朝奏事或身有疾病坐轎亦未為不可嗣

後諸王及滿洲文職一品大臣如早起來圓明園或身有微疾者著照常坐轎王大臣等不識朕意仍總不乘馬專坐轎者經朕察出必懲數人以為衆戒伊等各宜仰體朕體卹之意勿致廢弛滿洲武藝應乘馬之處照常乘馬黽勉向上再八旗大臣以不應坐轎久經禁止近聞有坐車者但伊等有何勞苦官差亦尚安逸坐車耶且伊等既有教訓官兵之責理宜為衆表率嗣後八旗大臣及部

院二品以下堂官內倘有坐車之人著御史等即行指名題叅朕必將違禁之人治罪斷不寬宥欽此二十一年

諭今王公大臣之轎夫開設賭場者甚多不獨將旗人引誘以失生理殊為可憫致令旗人流於匪僻無所底止闕繫尤重是以朕從前降旨王等一品文大臣及年老之文大臣坐轎其餘槩不準坐轎者一則不致廢弛乘馬二則為旗人計將轎夫開

設賭場之事清理之意今年少官卑人員皆行坐
轎若不嚴行管束縱令轎夫開設賭場豈非欲儉
省其工直誠如此尤可恥也應將伊等察出從重
處分但為日久又無專委察叅之人此次朕不
深究嗣後惟準親王郡王大學士尚書坐轎其貝
勒貝子公都統等皆不準坐轎從前因年老之二
品文臣皆令坐轎是以年少之大臣等亦照伊等
坐轎嗣後二品文大臣及京堂官無論年老與否

緊停坐轎仍令坐轎之王大臣等將轎夫各令在
其家或於方近居住加意管束倘有令其遠居開
設賭場者將該王大臣等一并議處此次降旨以
後仍有私行坐轎縱令轎夫開設賭場者著步軍
統領及該衙門該旗御史等即行叅奏從重議處
若不嚴察以致懈弛仍蹈舊習將失察之衙門官
員一并治罪斷不輕恕欽此○二十二年

諭外省駐防將軍及綠營之提鎮出行則皆乘輿夫

將軍提鎮有總統官兵之責若養尊處優自圖安逸亦何以表率營伍而作其勇敢之氣況旗人幼習騎射即綠營中亦必以其弓馬優嫻始歷加升用乃一至大僚轉致狃於便安忘其故步此豈國家簡擢之意耶京師都統副都統既皆乘馬而滿洲侍郎則無論年逾六旬亦皆不得乘輿即朕巡省所至尚每日乘馬而行乃外省武職獨相沿陋習此甚非宜嗣後將軍提督槩不許乘輿其編設

轎夫並著裁革如有仍行乘坐者照違例治罪可
通行傳諭知之欽此○又

諭前因外省將軍提鎮有表率營伍之責出皆乘輿
恐致狃於便安是以特行禁止但此內宣力已久
之年老大員又未可一槩而論嗣後如年逾七十
不能常行乘馬者令該員自行酌量奏聞請旨餘
不得假藉欽此

一外官儀衛康熙五年定各省駐防將軍副都

統視在京都統副都統○七年題準文官總督
杏黃纈二金黃棍二旗八扇二兵拳二鴈翎刀
二飛虎旗二獸劔二藤棍二皮槊二槍四迴避
牌二肅靜牌二巡撫減兵拳鴈翎刀飛虎旗及
槍二餘同布按兩司減旗二及獸劔藤棍槍餘
視巡撫道府杏黃纈一旗四扇一藤棍二皮槊
二迴避牌二肅靜牌二同知通判知州知縣藍
纈一扇一藤棍二皮槊二迴避牌二州同州判

縣丞藍繖一藤棍二雜職竹板二武官提督藤
棍皮槊改用刑杖二餘視總督總兵大刀一減
兵拳鴈翎刀刑杖及槍二餘視提督副將杏黃
繖一金黃棍二旗六扇二迴避牌二肅靜牌二
叅將遊擊都司杏黃繖扇各一旗四藤棍二迴
避肅靜牌各二守備減牌餘視都司

一命婦車輿崇德年間定超品公命婦車青蓋
青幃青垂檐公命婦藍垂檐餘同都統尚書子

等官命婦車青蓋藍幃藍垂幃內大臣大學士
副都統護軍統領前鋒統領侍郎等官命婦車
藍蓋藍幃藍垂幃一等侍衛護衛叅領前鋒叅
領學士郎中等官命婦車藍蓋素幃藍垂幃二
等侍衛護衛佐領等官命婦車素蓋素幃藍垂
幃○順治九年題準公命婦車青蓋青幃綠緣
蓋角綠垂幃侯伯命婦車青蓋青幃綠垂幃一
品官命婦車青蓋青幃青垂幃以上均用銀頂

二品官命婦車青蓋藍幃青垂檐三品官命婦
車藍蓋藍幃青垂檐四品官命婦車藍蓋藍幃
藍垂檐五品以下官命婦車藍蓋藍幃無垂檐
以上均用錫頂庶民妻藍蓋藍幃無垂檐黑油
木頂○康熙元年題準三品以上官命婦車用
銀頂四品以下官命婦用錫頂庶民妻同違者
治罪○三十年定三等公夫人車綠蓋青幃藍
緣蓋角綠垂檐侯伯夫人車綠蓋青幃藍緣蓋

角綠垂幃內大臣都統大學士尚書左都御史
子一品夫人車青蓋青幃綠緣蓋角綠垂幃散
秩大臣前鋒統領護軍統領步軍統領副都統
侍郎學士左副都御史通政使大理寺卿詹事
府詹事男夫人車青蓋青幃綠垂幃以上各幃
蓋幃均用素段一等待衛叅領步軍翼尉王府
長史太常太僕光祿寺卿國子監祭酒大理寺
少卿內閣侍讀學士翰林院講讀學士侍讀侍

講少詹庶子洗馬鴻臚寺卿郎中給事中御史
太常太僕光祿寺少卿輕車都尉淑人車青蓋
青幃青垂檐以上車均用銀頂閒散宗室二等
侍衛佐領貝勒司儀長欽天監正內閣侍讀國
子監司業鴻臚寺少卿通政使司叅議中允員
外郎步軍協尉騎都尉恭人車青蓋藍幃青垂
檐三等侍衛雲騎尉宜人以下車藍蓋藍幃青
垂檐以上均用錫頂幃蓋檐用布轆輪均用黑

自公以下有頂帶官員以上各命婦均從夫見
在品級不準以加級用

欽定大清會典則例卷七十二

欽定四庫全書

欽定大清會典則例卷七十三

禮部

儀制清吏司

相見禮

一內外王公相見儀崇德年間定外藩親王來見親王主人出殿降階迎主人居左賓居右由殿中門入主人西面立賓東面立行二跪六叩

禮就坐主人位於東賓位於西從官於殿外行
二跪六叩禮從賓後坐辭退從官行一跪一叩
禮先退賓離位行一跪一叩禮主人答禮如之
送至初迎處本府官屬送至府門外退外藩郡
王來見主人出殿迎不降階由中門先入賓隨
入行二跪六叩禮主人跪受半禮答半禮辭退
賓離坐行一跪一叩禮主人跪拱手不叩興送
至初迎處餘儀與外藩親王見同外藩員勒來

見主人離坐迎不出殿賓由殿右門入行二跪
六叩禮主人拱手立受就坐主人位正中賓位
西旁辭退賓離坐行一跪一叩禮主人立受如
初賓出不送餘儀與外藩郡王見同外藩貝子
公來見府屬官引進殿內行二跪六叩禮主人
拱手正坐受辭退賓離坐行一跪一叩禮主人
坐受如初從官退至原叩處行一跪一叩禮畢
出餘儀與外藩貝勒見同外藩親王來見郡王

主人迎送於大門內辭退賓主人各就坐行一
跪一叩禮餘儀與見親王同外藩郡王來見與
內外親王相見同外藩貝勒來見與外藩郡王
見親王同外藩貝子來見與外藩貝勒見親王
同外藩公來見郡王與見親王同外藩親王來
見貝勒主人迎於府門外賓先行主人稍後入
行一跪三叩禮從官行禮亦一跪三叩辭退送
至初迎處餘儀與見郡王同外藩郡王來見賓

主及從官行禮均一跪三叩餘儀與外藩親王
見郡王同外藩貝勒來見賓主行禮咸一跪三
叩餘儀與內外郡王相見同外藩貝子來見賓
主行禮咸一跪三叩餘儀與外藩貝勒見郡王
同外藩公來見與外藩貝子見郡王同外藩王
貝勒來見貝子貝子迎於大門外賓先行主人
隨入賓主行一跪一叩禮從官亦一跪一叩主
人拱手生受辭退從官行禮拱受如初送賓於

初迎處候乘馬乃退餘儀與外藩郡王見貝勒
同外藩貝子來見賓主行禮咸一跪一叩餘儀
與內外貝勒相見同外藩公來見賓主行禮咸
一跪一叩餘儀與外藩貝子見貝勒同外藩王
貝勒來見公與見貝子同外藩貝子來見迎送
於大門內餘儀與外藩貝勒見貝子同外藩公
來與內外貝子相見同

一王公塗遇儀崇德元年定親王出行郡王遇

讓道行貝勒遇執事迴避讓道旁行貝子鎮國
公固倫額駙和碩公主額駙遇勒馬鞠躬側立
道旁候過輔國公鎮國將軍民公都統尚書以
下皆下馬立道旁候過固倫公主和碩公主遇
相讓尊長在先分路行郡主以下縣君以上遇
停車候過○郡王出行貝勒公主以下遇與遇
親王迴避儀同○貝勒出行貝子鎮國公固倫
額駙和碩公主額駙遇讓道旁行輔國公鎮國

將軍民公都統尚書遇勒馬側立道旁候過輔
國將軍副都統侍郎等官以下皆下馬立道旁
候過固倫公主和碩公主遇貝勒讓道行郡主
縣主郡君遇相讓分路行縣君遇停車候過○

貝子出行鎮國公和碩公主額駙遇分路行輔
國公鎮國將軍民公都統尚書遇讓道旁行輔
國將軍副都統侍郎及叅領等官遇勒馬側立
道旁候過佐領等官以下皆下馬候過固倫公

主和碩公主遇貝子勒馬候過郡主縣主遇貝子讓道行郡君縣君遇相讓分路行。○鎮國公出行輔國公鎮國將軍民公都統尚書遇分路行輔國將軍副都統侍郎及叅領等官遇勒馬側立道旁候過佐領以下等官皆下馬候過。

輔國公出行鎮國將軍都統尚書等官遇分路行輔國將軍副都統侍郎等官遇讓道旁行奉國將軍叅領佐領等官遇勒馬立於道旁候過。

護軍校驍騎校等官及軍民人等皆下馬候過
○鎮國將軍出行輔國將軍副都統侍郎等官
遇分路行奉國將軍叅領佐領等官遇勒馬立
於道傍候過護軍校驍騎校等官及軍民人等
皆下馬候過○輔國將軍出行奉國將軍叅領
等官遇讓道旁行佐領等官遇勒馬候過護軍
校驍騎校等官及軍民人等皆下馬候過○奉
國將軍出行佐領等官遇讓道行護軍校驍騎

校等官及軍民人等皆勒馬候過○閒散宗室
遇親王以下輔國將軍以上皆下馬遇民公以
下大臣皆不下馬分路行○覺羅有職者各照
品級迴避無職者遇親王以下輔國將軍以上
皆下馬遇民公都統尚書等官皆引馬迴避其
餘各官皆不迴避讓道行凡奉

欽差及齎奉

勅旨或

欽賜恩賞者遇王等於道及過王府門皆不下馬。

又定親王府門郡王過並隨從人員皆不下馬
貝勒過鞠躬趨馬過隨從人員皆下馬親王福
晉郡王福晉過序長幼應下車者步行過不應
下車者徑過隨從婦女各照其主固倫公主和
碩公主郡主縣主過並隨從婦女皆不下車馬
隨從人員皆下馬郡君縣君過不下車隨從男
婦皆下車馬貝子和碩公主額駙民公以下官

員及軍民人等過皆下馬貝勒夫人以下官員
命婦及軍民人等婦女過皆下車馬 郡王府
門與親王同○貝勒府門貝子鎮國公過不下
馬隨從人員皆下馬輔國公和碩公主額駙民
公以下官員及軍民人等過皆下馬貝勒夫人
過序長幼應下車者步行過不應下車者徑過
隨從婦女各照其主郡君縣君過並隨從婦女
皆不下車馬隨從人員皆下馬貝子夫人以下

官員命婦及軍民人等婦女過皆下車馬○康熙十八年題準和碩公主遇親王郡王停車候過遇貝勒相讓分路行遇貝子貝子讓道行和碩公主額駙郡主額駙遇親王郡王皆下馬立道旁候過遇貝勒勒馬側立道旁候過遇貝子讓道旁行遇鎮國公分路行閒散宗室遇和碩公主額駙不下馬分路行覺羅無職者遇和碩公主額駙不下馬引馬迴避餘均照舊例行

一王貝勒府屬慶賀儀崇德元年定親王生辰及元日該旗都統以下佐領以上官員齊集稱賀行二跪六叩禮郡王生辰及元日本府屬員齊集稱賀行二跪六叩禮貝勒生辰及元日本府屬員齊集稱賀行一跪三叩禮若該屬官員無事不至府慶賀者治罪。順治九年題準親王郡王貝勒生辰及元日該府屬員聽鳴贊人員贊唱行禮作樂其鳴贊人員聽各府選擇

一京官相見儀雍正五年定八旗官於本署白
事都統副都統前叅領侍立佐領以下官屈一
膝其侍衛藍翎侍衛及騎都尉以上之副叅領
署叅領並視叅領雲騎尉以下之副叅領並視
佐領驍騎校等官白事於叅領前屈一膝佐領
前侍立步軍副尉在步軍統領前屈一膝翼尉
前侍立步軍尉城門領在統領翼尉前咸屈一
膝在協尉前侍立公所白事都統副都統前男

以上官侍立輕車都尉以下官屈一膝管旗務
之王貝勒貝子入八分公前叅領以下官咸屈
一膝佐領繫大臣兼攝者從其品繫小京堂及
科道等官兼攝者視叅領繫宗室於八旗都統
前皆侍立前鋒統領護軍統領前前鋒叅領侍
衛護軍叅領侍衛以下騎都尉以上之各副叅
領署叅領並視八旗叅領雲騎尉以下副叅領
署叅領及護軍叅領署叅領並視八旗佐領前

鋒校護軍校視八旗驍騎校如八旗官白事於別旗各長官與本旗同有越分違例者該管大員並稽察八旗御史題叅議處○又奉

旨宗室管佐領白事於王公前皆著屈一膝○又定各部院司官路遇堂官勒馬候過在本署理事堂官上坐司官侍立若事件繁多司官設褥席地序坐如在朝房堂官席地坐司官屈一膝白事堂官前往來皆趨過滿漢司官一例遵行不得

互異違者堂官指叅議處其漢科道亦照滿科
道儀節違者如之堂官如徇情容隱察出一并
議處

一京官途遇儀崇德元年定固倫額駙出行鎮
國公和碩公主額駙過分路行輔國公鎮國將
軍民公都統尚書等官遇讓道旁行輔國將軍
副都統侍郎及叅領等官遇勒馬立於道旁候
過佐領等官以下遇皆下馬候過

若額駙繫親
王郡王貝勒

各照本爵○超品公和碩公主額駙出行都統子尚

書等官遇讓道旁行副都統侍郎叅領等官遇

勒馬立於道旁候過佐領等官以下過皆下馬

候過

若額駙繫親王郡王貝勒貝子各照本爵

○民公郡主額駙出

行都統子尚書等官遇分路行副都統侍郎等

官遇讓道旁行叅領佐領等官遇勒馬立於道

旁候過護軍校驍騎校等官及軍民人等皆下

馬候過○都統子尚書縣主額駙出行副都統

侍郎等官遇讓道旁行叅領佐領等官遇勒馬
立於道旁候過護軍校驍騎校等官及軍民人
等皆下馬候過○內大臣副都統護軍統領前
鋒統領郡君額駙大學士侍郎等官出行叅領
等官遇讓道旁行佐領等官遇勒馬候過護軍
校驍騎校等官及軍民人等皆下馬候過○一
等侍衛護衛叅領前鋒叅領縣君額駙學士滿
啟心郎郎中等官出行佐領等官遇讓道旁行

護軍校驍騎校等官及軍民人等皆勒馬候過
○二等侍衛護衛鄉君額駙佐領漢啟心郎員
外郎等官出行護軍校驍騎校等官及軍民人
等遇讓道行○超品公以下文武各官命婦皆
照本夫迴避例○凡奉

欽差及奉齋

勅旨或

欽賜恩賞者遇應迴避官不下馬分路行○順治八

年題準官員迴避等儀均與崇德元年定例同
其新設官員侯伯與民公同男與副都統同輕
車都尉與叅領同騎都尉雲騎尉與佐領同內
大臣改與都統同○九年題準民公和碩公主
額駙郡主額駙侯伯出行都統子尚書等官遇
分路行副都統侍郎等官遇讓道旁行叅領郎
中佐領員外郎雲騎尉主事等官遇勒馬立於
道旁候過護軍校驍騎校等官及軍民人等皆

下馬候過○都統內大臣子尚書縣主額駙出行副都統侍郎等官遇讓道旁行叅領郎中佐領員外郎雲騎尉主事等官遇勒馬立於道旁候過護軍校驍騎校等官及軍民人等皆下馬候過○護軍統領步軍統領副都統侍郎男前鋒統領郡君額駙等官出行叅領郎中等官遇讓道旁行佐領員外郎雲騎尉主事等官遇勒馬候過護軍校驍騎校等官及軍民人等皆下

馬候過○一等侍衛護衛叅領輕車都尉郎中
縣君額駙等官出行佐領員外郎雲騎尉主事
等官遇讓道旁行護軍校驍騎校等官及軍民
人等遇皆勒馬候過○二等侍衛護衛騎都尉
佐領員外郎鄉君額駙雲騎尉主事等官出行
護軍校驍騎校等官及軍民人等遇讓道旁行
民公以下文武各官命婦均照本夫迴避例
康熙十八年題準在京武職民公侯伯以下

散秩大臣男以上文職大學士尚書以下學士
大九卿以上許用引馬一官卑及軍民人等遇
皆照例下馬迴避違者送該部議處其不應用
引馬而擅用者官交該部議處民交刑部治罪
一直省文職官相見儀康熙三十三年定督撫
開門視事撫先督後每月逢五逢十督撫司道
府廳等官均停相見大小各官除朝賀祭祀及
到任外相見不具朝服○雍正八年定總督河

道總督漕運總督巡撫觀風整俗使學院巡鹽御史巡察御史巡視臺灣御史相見坐次及文移均平行司道見督撫大門外下轎由左門進督撫迎至堂後屏內初見用履歷手本具補服行庭叅禮督撫親扶免三揖常見用官銜手本三揖坐次督撫正坐司道侍坐待茶辭出三揖督撫送至暖閣後司道三揖拱立俟督撫入屏門復三揖出督撫次日用名東答拜凡司道揖

督撫皆答揖文移督撫下行用牌司道上行用
申文府廳見督撫由左門進初見用履歷手本
具補服行庭衆禮稟拜免三揖常見用官銜手
本三揖旁坐待茶辭出三揖督撫起立不送不
答拜凡府廳揖督撫皆答揖州縣見督撫稟揖
皆起立拱手餘儀與府廳同如府廳州縣同見
西向列坐府廳在前州縣稍後教官見督撫與
州縣同首領佐貳雜職等官見督撫由左門進

初見用履歷手本具補服一跪三叩不揖不坐
常見用官銜手本餘儀同府廳見司道由左門
進初見用履歷手本具補服行庭參禮司道親
扶免三揖常見用官銜手本三揖坐次府廳西
面司道東北面待茶辭出三揖兩司送至暖閣
後各道送至大堂檐下三揖出司道於次日用
名柬答拜凡府廳揖司道皆答揖文移司道下
行用牌府廳上行用申文州縣見司道行庭參

禮稟拜免不答拜餘儀與府廳同教官見司道
與州縣同首領佐貳雜職等官見司道與見督
撫同同知通判見知府用晚生名東由中門進
行賓主禮文移府用關文同知通判用牒呈州
縣佐貳見州縣與佐貳見知府同知縣見府廳
府送至堂後屏內廳送至大堂前檐下餘儀與
知府見司道同文移府廳下行用牌知縣上行
用申文直隸州知州見上司及接屬員與知府

同與各府皆用牒呈府與直隸州用墨筆照會
州行所轄知縣用牌知縣用申文非所屬者仍
用移文直隸州州同州判見上司及接屬官與
府同知通判同兩司首領官與府廳州縣相見
用名柬由中門進惟照磨知事與府廳用晚生
名柬由左門進皆行賓主禮文移府廳州縣用
關文兩司首領等官與府用牒呈與廳及州縣
用關文教官見府廳與知縣同府首領與縣佐

貳等官見知府與見司道同見廳與州縣見兩
司同雜職等官見府廳與見司道同直隸州儒
學及州縣儒學見知州知縣用晚生名東由中
門進行賓主禮文移知州用牒儒學用牒呈與
州同州判平行吏目典史及巡驛雜職見知縣
如知縣見知府禮文移知縣用牌雜職用申文
知縣與府首領州同州判皆平行

一督學管闕等官相見儀康熙二十九年題準

各關監督與督撫司道以下官相見及用文移
均照副將例行。雍正八年定司道見學院用
官銜名東儀門外下轎由中門進學院迎至堂
檐下司道三揖學院讓入後堂行賓主禮待茶
辭出三揖學院送至堂檐下三揖由中門步出
學院隨用名東答拜凡司道揖學院皆答揖文
移學院行兩司仰兩司經歷司鈔文呈堂兩司
亦票仰經歷司轉呈學院學院行道員以下皆

用牌各道用呈文如學院繫三品以上京堂出差者司道以下各官與見督撫禮同文移亦同府廳見學院大門外下轎由中門進學院迎送於堂後屏門外餘儀與司道見督撫同學院於次日用名東答拜文移學院用牌府廳以下皆用申文州縣見學院行庭叅禮學院出位答揖辭出學院送至堂後屏門內餘儀與見督撫同教官見學院與知縣見督撫同首領佐貳雜職

等官見學院與見督撫同司道以下等官見巡
鹽御史巡察御史巡視御史與見學院同文移
亦同。鹽運使鹽道見鹽院與司道見督撫同
文移亦同運同運副提舉運判見鹽院與府廳
見督撫同文移亦同鹽運使司經歷知事大使
等官見本管上司與首領雜職見上司禮同文
移亦同如鹽大使由舉人進士出身者其見上
司與州縣同運使見督撫與司道同運同見督

撫與知府同運副提舉運判見督撫與同知通判同

一順天府尹與府丞相見平行治中通判見府尹與直省司道見督撫同見府丞與直省司道見學政同經歷以下等官見府尹府丞治中通判與外府首領官見府廳同所屬州縣見府尹與見督撫同見府丞與見司道同見治中通判與見府廳同。奉天府屬知府見府尹與直省

知府見督撫同見府丞與見學政同其餘與順天同。奉天府所屬府州縣等官見

盛京五部侍郎與見奉天府尹同

一直省文武官相見儀順治十二年題準提督見總督由中門入至儀門外下馬總督至提督堂前下轎坐次總督正坐提督侍坐如提督兼子爵以上者總督居左提督居右文移總督用劄付提督用咨呈與巡撫相見坐次及文移皆

平行如巡撫加兵部銜者提督於儀門外下馬
與司道府廳相見坐次文移皆平行惟府廳於
提督儀門外下轎馬州縣見提督由左門出入
提督迎送至堂檐下後堂待坐州縣官旁坐文
移用呈稟總兵官見總督用履歷手本大門外
下馬由左門進堂上三揖總督答揖後堂待坐
總督正坐總兵官旁坐出送至堂檐下見巡撫
叅堂待坐巡撫拜總兵官大堂列坐皆至儀門

下轎馬迎送至下轎馬處文移各用手本巡撫
加兵部銜者總兵官由左門進堂上三揖巡撫
答揖後堂待坐迎送至堂檐下與司道分司運
同相見皆平行文移各用手本與府廳相見平
行總兵官文移行府仰經歷司鈔文呈堂府亦
行經歷司轉呈總兵與州縣相見行賓主禮丈
移用關牒副將見總督初見披執用履歷手本
行一跪禮稟拜免仍行一跪一揖禮出更衣入

侍立白事畢旁立三揖出常見不披執具銜名
手本餘儀同見巡撫初見披執行庭叅禮出更
衣入照司道例進見叅堂待茶三揖出見巡漕
巡鹽學政用官銜手本於大門外下馬由儀門
進各迎至月臺下上堂三揖呈送履歷及公文
各一揖叅堂待茶對坐出入讓各院先行下堂
三揖送至二門外副將候各院回至公座邊三
揖出副將自稱官銜各院答拜不用名東與布

按相見皆平行文移用手本出入由左門與各道相見皆平行文移用手本移會如協守副將於二門外下馬由中道進本道迎至月臺下堂上待茶出送至二門外視乘馬與各部分司運司府廳州縣官相見皆平行叅將游擊見總督用履歷手本披執進見行一跪一揖禮出更衣再見一跪一揖稟拜四叩出見巡撫由左門進至堂檐下行全屬禮耳房待茶出仍行全屬禮

旁立三揖出見布按二司皆平行文移用咨文
出入由左門於二門外下馬叅堂待茶見各道
皆平行於二門外下馬由中門進各道迎至堂
檐下叅堂待茶送至二門外視乘馬文移用手
本與府廳州縣相見皆平行都司見總督與叅
將同都司隨兩司見巡撫稟拜免行三揖禮後
堂待茶仍至前堂三司一揖出如獨見仍行庭
叅禮都司初見及霜降日皆披執進叅出更衣

入見照司道例待茶見布按二司平行文移用
咨文出入由左門於二門外下馬叅堂待茶見
各道平行營都司屯田都司見本道行庭叅禮
見各部分司皆平行營都司見戶部分司二門
外下馬後堂待茶分司往拜月臺下轎大堂待
茶營都司見分司用官銜手本堂前行禮畢一
揖即出與運司府廳州縣官相見皆平行專城
並道標及各營中軍守備見總督巡撫皆由左

門進至堂檐下行庭叅禮初見披執各衛掌印
守備並城守守備中軍守備皆行全叩禮見布
按二司各道用脚色手本行庭叅禮文移用申
呈初見稟披執加都司銜者仍行守備禮見分
司堂前行禮分司答揖文移用呈分司用牌見
知府用手本行屬禮文移用呈知府用照會廳
官州縣官皆平行凡提督總兵官以下守備以
上遇督撫出城閱兵操演咸披執○十三年題

準州縣官見提督及總兵官大門外下轎馬由
左門進至堂檐下三揖提督總兵官正坐州縣
侍坐茶畢稟辭由右門出不往拜文移州縣用
申文提督總兵官用照會見副將用官銜手本
大門外下馬進中門由甬道東邊至堂檐下三
揖副將還禮後堂待茶送至堂前出大門外上
馬文移州縣用牒呈副將用照會其餘文武各
官相見儀與十二年定例同○十八年題準提

督往見總督提督至儀門外下轎馬總督答拜
於堂檐前下轎坐次總督正坐提督僉坐與巡
撫相見平行文移皆用咨文司道分司運司見
提督於儀門下轎提督迎於堂檐下提督見司
道等官儀門下轎馬司道官迎出儀門送至各
迎處坐次提督正坐司道等官僉坐文移提督
用照會司道等官用咨呈府廳見提督於大門
外下轎馬由中門進坐次提督正坐府廳侍坐

提督迎送至檐下文移提督用劄付府廳用牒
呈州縣見提督於大門外下轎馬由左門進坐
次提督正坐州縣侍坐提督不迎送文移提督
用劄付州縣用申文總兵官見總督至儀門外
下馬總督迎至階上總督答拜總兵官於堂檐
前下轎總兵官迎出儀門送至各迎處坐次總
督正坐總兵官侍坐文移總督用照會總兵官
用咨呈與巡撫相見行賓主禮文移用咨文與

司道相見皆平行文移用咨文府廳見總兵官
於二門外下轎馬總兵官迎至階上總兵官見
府廳於儀門外下轎馬府廳迎出儀門外送至
各迎處坐次總兵官正坐府廳僉坐文移總兵
官用照會府廳用咨呈州縣見總兵官於大門
外下轎馬由中門進總兵官迎至檐下坐次總
兵官正坐州縣侍坐文移總兵官用照會州縣
用咨呈副將見總督用履歷手本於大門外下

馬由左門進初見稟披執免補服帶刀常見仍帶刀均北面三叩興西面侍立待茶畢三揖退初見巡撫稟披執免行庭參禮巡撫親扶免三揖巡撫正坐副將侍坐常見三揖辭退三揖巡撫送至堂後屏門內文移巡撫下行用劄付副將上行用申文與分司司道運司府廳相見行賓主禮文移各用手本州縣見副將用官銜手本於大門外下轎由中門進副將迎送至檐下

免三揖文移副將用照會州縣用牒呈叅將游擊以下武官見總督用履歷手本免披執行一跪三叩禮叅將游擊見巡撫於大門外下馬由左門進坐次巡撫正坐叅將游擊侍坐巡撫迎送至檐下文移巡撫下行用劄付叅將游擊上行用申文與布按二司文移用咨文與各道分司運司用手本與府廳用平關與州縣用手本相見皆平行都司守備千總見巡撫於大門外

下馬由左門進巡撫不迎送守禦所千總衛千
總行一跪三叩禮巡撫下行都司用劄付行守
備千總用牌票都司守備千總上行均用申文
免披執行全屬禮都司見布按二司行賓主禮
文移用手本與各道分司運司平行文移用手
本與府廳州縣平行文移用平關分防標下中
軍守備掌印專城並道標中軍及各營中軍守
備見巡撫於大門外下馬由左門進巡撫不迎

送巡撫用劄付各守備用申文免披執行全屬
禮見司道用官銜手本於大門外下馬由中門
進司道迎送至檐下文移司道用照會守備用
牒呈見分司府廳州縣行賓主禮文移用手本
○康熙二十年題準宣屬廳員有稽察錢糧之
責其屯衛守備行屬官禮○雍正八年定督撫
提督相見行賓主禮文移皆平行副將見提督
轅門外下馬由左門進初見用履歷手本稟披

執免補服帶刀行庭衆禮提督親扶免三揖侍
茶常見用官銜手本稟披執免仍帶刀三揖提
督皆出位答揖坐次提督正坐副將侍坐辭出
三揖提督送至所坐堂檐下文移提督下行用
牌副將上行用詳文呈文衆將游擊見提督行
一跪三叩禮畢三揖提督起立答揖待茶趨出
不揖辭提督起立不送餘儀與副將同都司守
備見提督由左門進初見用履應手本披執唱

銜三叩席地跪坐常見用官銜手本免披執唱
銜仍帶刀三叩出提督不起立千總把總見提
督不坐餘儀與守備同副將見兼轄總兵官總
兵官迎至堂後屏內送至暖閣後凡副將揖總
兵皆平立答揖餘儀與見提督同總兵用牌行
某協衙門副將用咨呈外協不屬者行賓主禮
文移總兵用照會副將用咨呈叅將游擊見本
轄總兵官行庭叅禮稟拜免三揖常見用官銜

手本三揖總兵官皆出位答揖餘儀與見提督
同如非本轄叅將游擊行庭叅禮總兵親扶免
辭出總兵送至所坐堂檐下餘儀同總兵下行
用牌叅將上行用詳文呈文都司守備見總兵
旁坐待茶餘儀與見提督同千總把總見總兵
官與見提督同叅將見副將行賓主禮文移平
行游擊見本轄副將行庭叅禮副將親扶免辭
出副將出位送餘儀與見總兵官同副將用牌

行游擊以下皆用詳文呈文如非本轄者相見
坐次皆平行文移副將用平關手本游擊用平
關咨呈都司守備見本轄副將不唱銜凡揖副
將皆起立答揖餘儀與見總兵官同如非本轄
者儀與叅游見同文移副將用照會都司守備
用呈文千總把總見副將與見總兵同游擊見
叅將行賓主禮文移皆平行都司守備見本轄
叅將游擊行庭叅禮常見三揖坐次叅將游擊


僉坐都司守備旁坐待茶畢三揖辭出叅將游擊出位送凡揖叅將游擊皆答揖餘儀與見副將同叅將游擊用牌行都司守備用詳文呈文如非本轄者都司與叅將游擊皆平行守備仍行庭叅禮免三揖叅將游擊答揖出送至堂後屏內叅將游擊用照會守備用咨呈千總把總見叅將游擊與見副將同叅將游擊用牌行千總把總用詳文呈文守備見都司行賓主禮文

移皆平行千總見本轄都司守備行庭叅禮都
司守備答揖常見用官銜手本一揖就坐都司
守備正坐千總旁坐茶畢趨出都司守備出位
送餘儀與守備見叅游同都司守備用牌行千
總用詳文呈文如非本轄者千總用庭叅禮親
扶免三揖都司守備答揖出送至堂後都司守
備用照會千總用呈文把總見都司守備初見
三叩都司守備答揖常見一揖旁坐待茶畢趨

出都司守備起立不送餘儀與見叅游同都司
守備用牌行把總用詳文呈文千總把總相見
坐次文移皆平行

一直省滿漢官相見儀順治十八年定直省鎮
守將軍與督撫提鎮相見各不相轄行賓主禮
文移皆用咨其餘文武各官見本省將軍與督
撫同○康熙十二年題準協領叅領等官見督
撫照布按兩司例行佐領防禦等官照各道員

例行驍騎校以下官照知州知縣例行



欽定大清會典則例卷七十三